

四庫全書

史部

欽定四庫全書

史部  
左傳紀事本末卷

二十九  
三十九

詳校官侍講學士<sub>臣</sub>平恕

編修<sub>臣</sub>裴謙覆勘

總校官庶吉士<sub>臣</sub>何思鈞

校對官中書<sub>臣</sub>李 棻

謄錄監生<sub>臣</sub>張 恒

欽定四庫全書

左傳紀事本末卷二十九

詹事府詹事高士奇撰

晉悼公復伯

成公三年夏晉人歸楚公子穀臣與連尹襄老之尸於楚以求知罃於是荀首佐中軍矣故楚人許之王送知罃曰子其怨我乎對曰二國治戎臣不才不勝其任以為俘馘執事不以釁鼓使歸即戮君之惠也臣實不才

又誰敢怨王曰然則德我乎對曰二國圖其社稷而求紓其民各懲其忿以相宥也兩釋累囚以成其好二國有好臣不與及其誰敢德王曰子歸何以報我對曰臣不任受怨君亦不任受德無怨無德不知所報王曰雖然必告不穀對曰以君之靈累臣得歸骨於晉寡君之以為戮死且不朽若從君之惠而免之以賜君之外臣首首其請於寡君而以戮於宗亦死且不朽若不獲命而使嗣宗職次及於事而帥偏師以修封疆雖遇執事

其弗敢違其竭力致死無有二心以盡臣禮所以報也  
王曰晉未可與爭重為之禮而歸之 荀瑩之在楚也  
鄭賈人有將寘諸楮中以出既謀之未行而楚人歸之  
賈人如晉荀瑩善視之如實出已賈人曰吾無其功敢  
有其實乎吾小人不可以厚誣君子遂適齊

發明悼公復伯智瑩為政凡駕楚服鄭皆瑩之謀也楚

共王於前此釋之歸晉似與秦康公釋士會相似亦  
不失為忠厚使能修德自強用人無失晉悼知瑩豈

為楚害哉惜其徒敝民力以爭鄭而闇於大較也

十八年春王正月庚申晉欒書中行偃使程滑弑厲公使荀瑩士魴逆周子於京師而立之生十四年矣大夫逆於清原周子曰孤始願不及此雖及此豈非天乎抑人之求君使出命也立而不從將安用君二三子用我今日否亦今日共而從君神之所福也對曰羣臣之願也敢不唯命是聽庚午盟而入館於伯子同氏辛巳朝於武宮遂不臣者七人周子有兄而無慧不能辨叔麥

故不可立

補逸

國語晉孫談之子周適周事單襄公立無跛視無  
還聽無聳言無遠言敬必及天言忠必及意言信必  
及身言仁必及人言義必及利言知必及事言勇必  
及制言教必及辨言孝必及神言惠必及和言讓必  
及敵晉國有憂未嘗不戚有慶未嘗不怡襄公有疾  
召頃公而告之曰必善晉周將得晉國其行也文能  
文則得天地天地所胙小而後國夫敬文之恭也忠

文之實也信文之孚也仁文之愛也義文之制也知  
文之與也勇文之帥也教文之施也孝文之本也惠  
文之慈也讓文之材也象天能敬帥意能忠思身能  
信愛人能仁利制能義事建能知帥義能勇施辯能  
教昭神能孝慈和能惠推敵能讓比十一者夫子皆  
有焉天六地五數之常也經之以天緯之以地經緯  
不爽文之象也文王質文故天胙之以天下夫子被  
之矣其昭穆又近可以得國且夫立無跛正也視無

還端也聽無聳成也言無遠慎也夫正德之道也端  
德之信也成德之終也慎德之守也守終純固道正  
事信明令德矣慎成端正德之相也為晉休戚不背  
本也被文相德非國何取成公之歸也吾聞晉之筮  
之也遇乾之否曰配而不終君三出焉一既往矣後  
之不知其次必此且吾聞之成公之生也其母夢神  
規其臀以墨曰使有晉國三而畀驪之孫故名之曰  
黑臀於今再矣襄公曰驪此其孫也而令德孝恭非

此其誰且其夢曰必驩之孫實有晉國其卦曰必三  
取君於周其德又可以君國三襲焉吾聞之大誓故  
曰朕夢協於朕卜襲於休祥戎商必克以三襲也晉  
仍無道而鮮胄其將失之矣必蚤善晉子其當之也  
頃公許諾及厲公之亂召周子而立之是為悼公  
史記悼公者其大父捷晉襄公少子也不得立號為  
桓叔桓叔最愛桓叔生惠伯談談生悼公周

二月乙酉朔晉悼公即位于朝始命百官施舍已責逮

鰥寡振廢滯匡乏困救災患禁淫慝薄賦斂宥罪戾節  
器用時用民欲無犯時使魏相士魴魏頡趙武為卿荀  
家荀會樂廩韓無忌為公族大夫使訓卿之子弟共儉  
孝弟使士渥濁為太傅使修范武子之法右行辛為司  
空使修士蒞之法弁糾御戎校正屬焉使訓諸御知義  
荀賓為右司士屬焉使訓勇力之士時使卿無共御立  
軍尉以攝之祁奚為中軍尉羊舌職佐之魏絳為司馬  
張老為候奄鐸遏寇為上軍尉籍偃為之司馬使訓卒

乘親以聽命程鄭為乘馬御六駟屬馬使訓羣駟知禮  
凡六官之長皆民譽也舉不失職官不易方爵不踰德  
師不陵正旅不偪師民無謗言所以復霸也

攷異

國語既殺厲公欒武子使知武子彘恭子如周迎

悼公庚午大夫逆於清原公言於諸大夫曰孤始願  
不及此孤之及此天也抑人之有元君將稟命焉若  
稟而棄之是焚穀也其稟而不材是穀不成也穀之不  
成孤之咎也成而焚之二三子之虐也孤欲長處其

願出令將不敢不成二三子為令之不從故求元君  
而訪焉孤之不元廢也其誰怨元而以虐奉之二三  
子之制也若欲奉元以濟大義將在今日若欲暴虐  
以離百姓反易民常亦在今日圖之進退願由今日  
大夫對曰君鎮撫羣臣而大庇蔭之無乃不堪君訓  
而陷於大戮以煩刑史辱君之允令敢不承業乃盟  
而入辛巳朝於武宮定百事立百官育門子選賢良  
興舊族出滯賞畢故刑赦囚繫宥閒罪薦積德逮鯁

寡振廢淹養老幼恤孤疾年過七十者公親見之稱  
曰王父王父不敢不承二月乙酉悼公即位使呂宣  
子佐下軍曰邲之役呂錡佐知莊子於上軍獲楚公  
子穀臣與連尹襄老以免子羽鄢之役親射楚王而  
敗楚師以定晉國而無後其子孫不可不崇也使彘  
恭子將新軍曰武子之季文子之母弟也武子宣法  
以定晉國至於今是用文子勤身以定諸侯至於今  
是賴夫二子之德其可忘乎故以彘季屏其宗使令

狐文子佐之曰昔克潞之役秦來圖敗晉功魏顆以  
其身卻退秦師於輔氏親止杜回其勲銘於景鐘至  
於今不育其子不可不興也君知士貞子之帥志博  
聞而宣惠於教也使為大傅知右行辛之能以數宣  
物定功也使為司空知樂糾之能御以蘇於政也使  
為戎御知荀賓之有力而不暴也使為戎右樂伯請  
公族大夫公曰荀家惇惠荀禴文敏廩也果敢無忌  
鎮靖使茲四人者為之夫膏梁之性難正也故使敦

惠者教之使文敏者道之使果敢者諗之使鎮靖者  
修之惇惠者教之則徧而不倦文敏者道之則婉而  
入果敢者諗之則過不隱鎮靖者修之則壹使茲四  
人者為公族大夫公知祁奚之果而不淫也使為元  
尉知羊舌職之聰敏肅給也使佐之知魏絳之勇而  
不亂也使為元司馬知張老之知而不詐也使為元  
候知鐸遏寇之恭敬而信彊也使為輿尉知籍偃之  
惇率舊職而共給也使為輿司馬知程鄭之端而不淫

且好諫而不隱也使為贊僕始合諸侯於虛打以救  
宋使張老延君譽於四方且觀道逆者呂宣子卒公  
以趙文子為文也而能恤大事使佐新軍三年公始  
合諸侯四年諸侯會於雞丘於是乎布令結援修好  
申盟而還令狐文子卒公乃以魏絳為不犯使佐新  
軍使張老為司馬使范獻子為候奄公譽達於戎五  
年諸侯來請服使魏莊子盟之於是乎始復伯

公如晉朝嗣君也

夏六月鄭伯侵宋及曹門外遂會

楚子伐宋取朝郟楚子辛鄭皇辰侵城郟取幽丘同伐  
彭城納宋魚石向為人鱗朱向帶魚府焉以三百乘戍  
之而還書曰復入凡去其國國逆而立之曰入復其位  
曰復歸諸侯納之曰歸以惡曰復入宋人患之西鉏吾  
曰何也若楚人與吾同惡以德於我吾固事之也不敢  
貳矣大國無厭鄙我猶憾不然而收吾憎使贊其政以  
閔吾釁亦吾患也今將崇諸侯之姦而披其地以塞夷  
庚逞姦而攜服毒諸侯而懼吳晉吾庸多矣非吾憂也

且事晉何為晉必恤之 公至自晉晉范宣子來聘且  
拜朝也君子謂晉於是乎有禮 秋杞桓公來朝勞公  
且問晉故公以晉君語之杞伯於是驟朝於晉而請為  
昏 七月宋老佐華喜圍彭城老佐卒焉 冬十一月  
楚子重救彭城伐宋宋華元如晉告急韓獻子為政曰  
欲求得人必先勤之成霸安疆自宋始矣晉侯師於台  
谷以救宋遇楚師於靡角之谷楚師還 晉士魴來乞  
師季文子問師數於臧武仲對曰伐鄭之役知伯實來

下軍之佐也今彘季亦佐下軍如伐鄭可也事大國無失班爵而加敬焉禮也從之 襄公元年春己亥圍宋彭城非宋地追書也於是為宋討魚石故稱宋且不登叛人也謂之宋志彭城降晉晉人以宋五大夫在彭城者歸寘諸瓠丘齊人不會彭城晉人以為討二月齊太子光為質於晉 夏五月晉韓厥荀偃帥諸侯之師伐鄭入其郟敗其徒兵於洧上於是東諸侯之師次於郟以待晉師晉師自鄭以郟之師侵楚焦夷及陳晉侯衛

侯次於戚以為之援 秋楚子辛救鄭侵宋呂留鄭子  
然侵宋取犬丘 冬衛子叔晉知武子來聘禮也凡諸  
侯即位小國朝之大國聘焉以繼好結信謀事補闕禮  
之大者也 二年春鄭師侵宋楚令也 鄭成公疾子  
駟請息肩於晉公曰楚君以鄭故親集矢於其目非異  
人任寡人也若背之是棄力與言其誰暱我免寡人唯  
二三子秋七月庚辰鄭伯踰卒於是子罕當國子駟為  
政子國為司馬晉師侵鄭諸大夫欲從晉子駟曰官命

未改 會於戚謀鄭故也孟獻子曰請城虎牢以偪鄭  
知武子曰善鄭之會吾子聞崔子之言今不來矣滕薛  
小邾之不至皆齊故也寡君之憂不唯鄭瑩將復於寡  
君而請於齊得請而告吾子之功也若不得請事將在  
齊吾子之請諸侯之福也豈唯寡君賴之 冬復會於  
戚齊崔武子及滕薛小邾之大夫皆會知武子之言故  
也遂城虎牢鄭人乃成 楚公子申為右司馬多受小  
國之賂以偪子重子辛楚人殺之故書曰楚殺其大夫

公子申 三年春公如晉始朝也 夏盟於長檣孟獻子相公稽首知武子曰天子在而君辱稽首寡君懼矣孟獻子曰以敝邑介在東表密邇仇讐寡君將君是望敢不稽首 晉為鄭服故且欲修吳好將合諸侯使士匄告於齊曰寡君使匄以歲之不易不虞之不戒寡君願與一二兄弟相見以謀不協請君臨之使匄乞盟齊侯欲勿許而難為不協乃盟於郕外 祁奚請老晉侯問嗣焉稱解狐其讐也將立之而卒又問焉對曰午也

可於是羊舌職死矣晉侯曰孰可以代之對曰赤也可於是使祁午為中軍尉羊舌赤佐之君子謂祁奚於是能舉善矣稱其讐不為諂立其子不為比舉其偏不為黨商書曰無偏無黨王道蕩蕩其祁奚之謂矣解狐得舉祁午得位伯華得官建一官而三物成能舉善也夫唯善故能舉其類詩云惟其有之是以似之祁奚有焉

補逸

國語祁奚辭於軍尉公問焉曰孰可對曰臣之子

午可人有言曰擇臣莫若君擇子莫若父午之少也

婉以從令游有鄉處有所好學而不戲其壯也彊志  
而用命守業而不淫其冠也和安而好敬柔惠小物  
而鎮定大事有直質而無流心非義不變非上不舉  
若臨大事其可以賢於臣也臣請薦所能擇而君比  
義焉公使祁午為軍尉沒平公軍無秕政

六月公會單頃公及諸侯己未同盟於雞澤晉侯使荀  
會逆吳子於淮上吳子不至 楚子辛為令尹侵欲於  
小國陳成公使袁僑如會求成晉侯使和組父告於諸

侯秋叔孫豹及諸侯之大夫及陳袁僑盟陳請服也

晉侯之弟揚干亂行於曲梁魏絳戮其僕晉侯怒謂羊舌赤曰合諸侯以為榮也揚干為戮何辱如之必殺魏絳無失也對曰絳無貳志事君不辟難有罪不逃刑其將來辭何辱命焉言終魏絳至授僕人書將伏劍士魴張老止之公讀其書曰日君乏使使臣斯司馬臣聞師衆以順為武軍事有死無犯為敬君合諸侯臣敢不敬君師不武執事不敬罪莫大焉臣懼其死以及揚干無

所逃罪不能致訓至於用鉞臣之罪重敢有不從以怒  
君心請歸死於司寇公跣而出曰寡人之言親愛也吾  
子之討軍禮也寡人有弟弗能教訓使干大命寡人之  
過也子無重寡人之過敢以為請晉侯以魏絳為能以  
刑佐民矣反役與之禮食使佐新軍張老為中軍司馬  
士富為候奄

補逸國語悼公使張老為卿辭曰臣不如魏絳夫絳之  
知能治大官其仁可以利公室不忘其勇不疚於刑

其學不廢其先人之職若在卿位外內必平且雞丘之會其官不犯而辭順不可不賞也公五命之固辭乃使為司馬使魏絳佐新軍

楚司馬公子何忌侵陳陳叛故也 許靈公事楚不會於雞澤冬晉知武子帥師伐許 四年春楚師為陳叛故猶在繁陽韓獻子患之言於朝曰文王帥殷之叛國以事紂唯知時也今我易之難哉三月陳成公卒楚人將伐陳聞喪乃止陳人不聽命臧武仲聞之曰陳不服

於楚必亡大國行禮焉而不服在大猶有咎而况小乎  
夏楚彭名侵陳陳無禮故也 穆叔如晉報知武子之  
聘也晉侯享之金奏肆夏之三不拜工歌文王之三又  
不拜歌鹿鳴之三三拜韓獻子使行人子員問之曰子  
以君命辱於敝邑先君之禮藉之以樂以辱吾子吾子  
舍其大而重拜其細敢問何禮也對曰三夏天子所以  
享元侯也使臣弗敢與聞文王兩君相見之樂也臣不  
敢及鹿鳴君所以嘉寡君也敢不拜嘉四牡君所以勞

使臣也敢不重拜皇皇者華君教使臣曰必諮于周臣  
聞之訪問於善為咨咨親為詢咨禮為度咨事為諏咨  
難為謀臣獲五善敢不重拜 楚人使頓間陳而侵伐  
之故陳人圍頓 無終子嘉父使孟樂如晉因魏莊子  
納虎豹之皮以請和諸戎晉侯曰戎狄無親而貪不如  
伐之魏絳曰諸侯新服陳新來和將觀於我我德則睦  
否則攜貳勞師於戎而楚伐陳必弗能救是棄陳也諸  
華必叛戎禽獸也獲戎失華無乃不可乎夏訓有之曰

有窮后羿公曰后羿何如對曰昔有夏之方衰也后羿自鉏遷於窮石因夏民以代夏政恃其射也不修民事而淫於原獸棄武羅伯因熊髡危圍而用寒浞寒浞伯明氏之讒子弟也伯明后寒棄之夷羿收之信而使之以爲已相浞行媚於內而施賂於外愚弄其民而虞羿於田樹之詐慝以取其國家外內咸服羿猶不悛將歸自田家衆殺而亨之以食其子其子不忍食諸死於窮門靡奔有鬲氏浞因羿室生澆及豷恃其讒慝詐偽而不

德於民使澆用師滅斟灌及斟尋氏處澆於過處豷于  
戈靡自有鬲氏收二國之燼以滅浞而立少康少康滅  
澆於過后杼滅豷於戈有窮由是遂亡失人故也昔周  
辛甲之為大史也命百官箴王闕於虞人之箴曰芒  
芒禹跡畫為九州經啓九道民有寢廟獸有茂草各有  
攸處德用不擾在帝夷羿冒於原獸忘其國恤而思其  
麇牡武不可重用不恢於夏家獸臣司原敢告僕夫虞  
箴如是不懲乎於是晉侯好田故魏絳及之公曰然

則莫如和戎乎對曰和戎有五利焉戎狄荐居貴貨易  
土土可賈馬一也邊鄙不聳民狎其野穡人成功二也  
戎狄事晉四鄰振動諸侯威懷三也以德綏戎師徒不  
勤甲兵不頓四也鑿於后羿而用德度遠至邇安五也  
君其圖之公說使魏絳盟諸戎修民事田以時 五年  
秋楚人討陳叛故曰由令尹子辛實侵欲焉乃殺之書  
曰楚殺其大夫公子壬夫貪也君子為楚共王於是不  
刑詩曰周道挺挺我心扃扃講事不令集人來定已則

無信而殺人以逞不亦難乎夏書曰成允成功 九月

丙午盟於戚會吳且命戍陳也 楚子囊為令尹范宣

子曰我喪陳矣楚人討貳而立子囊必改行而疾討陳

陳近於楚民朝夕急能無往乎有陳非吾事也無之而

後可冬諸侯戍陳子囊伐陳十一月甲午會於城棣以

救之 七年冬楚子囊圍陳會於鄒以救之 陳人患

楚慶虎慶寅謂楚人曰吾使公子黃往而執之楚人從

之二慶使告陳侯於會曰楚人執公子黃矣君若不來

羣臣不忍社稷宗廟懼有二圖陳侯逃歸 八年春公  
如晉朝且聽朝聘之數 庚寅鄭子國子耳侵蔡獲蔡  
司馬公子燮鄭人皆喜唯子產不順曰小國無文德而  
有武功禍莫大焉楚人來討能勿從乎從之晉師必至  
晉楚伐鄭自今鄭國不四五年弗得寧矣子國怒之曰  
爾何知國有大命而有正卿童子言焉將為戮矣 五  
月甲辰會於邢丘以命朝聘之數使諸侯之大夫聽命  
季孫宿齊高厚宋向戌衛甯殖邾大夫會之鄭伯獻捷

於會故親聽命大夫不書尊晉侯也 冬楚子囊伐鄭  
討其侵蔡也子駟子國子耳欲從楚子孔子矯子展欲  
待晉子駟曰周詩有之曰俟河之清人壽幾何兆云詢  
多職競作羅謀之多族民之多違事滋無成民急矣姑  
從楚以紓吾民晉師至吾又從之敬共幣帛以待來者  
小國之道也犧牲玉帛待於二竟以待彊者而庇民焉  
寇不為害民不罷病不亦可乎子展曰小所以事大信  
也小國無信兵亂日至亡無日矣五會之信今將背之

雖楚救我將安用之親我無成鄙我是欲不可從也不  
如待晉晉君方明四軍無闕八御和睦必不棄鄭楚師  
遼遠糧食將盡必將速歸何患焉舍之聞之杖莫如信  
完守以老楚杖信以待晉不亦可乎子駟曰詩云謀夫  
孔多是用不集發言盈庭誰敢執其咎如匪行邁謀是  
用不得於道請從楚駢也受其咎乃及楚平使王子伯  
駢告於晉曰君命敝邑修而車賦倣而師徒以討亂畧  
蔡人不從敝邑之人不敢寧處悉索敝賦以討於蔡獲

司馬燮獻於邢丘今楚來討曰女何故稱兵於蔡焚我  
郊保馮陵我城郭敝邑之衆夫婦男女不皇啓處以相  
救也翦焉傾覆無所控告民死亡者非其父兄即其子  
弟夫人愁痛不知所庇民知窮困而受盟於楚孤也與  
其二三臣不能禁止不敢不告知武子使行人子員對  
之曰君有楚命亦不使一介行李告於寡君而即安於  
楚君之所欲也誰敢違君寡君將帥諸侯以見於城下  
唯君圖之 晉范宣子來聘且拜公之辱告將用師於

鄭公享之宣子賦標有梅季武子曰誰敢哉今譬於草木寡君在君君之臭味也歡以承命何時之有武子賦角弓賓將出武子賦彤弓宣子曰城濮之役我先君文公獻功於衡雍受彤弓於襄王以為子孫藏也先君守官之嗣也敢不承命君子以為知禮 九年夏季武子如晉報宣子之聘也 秦景公使士稚乞師於楚將以伐晉楚子許之子囊曰不可當今吾不能與晉爭晉君類能而使之舉不失選官不易方其御讓於善其大

夫不失守其士競於教其庶人力於農稽商工皂隸不知遷業韓厥老矣知瑩稟焉以為政范匄少於中行偃而上之使佐中軍韓起少於欒黶而欒黶士魴上之使佐上軍魏絳多功以趙武為賢而為之佐君明臣忠上讓下競當是時也晉不可敵事之而後可君其圖之王曰吾既許之矣雖不及晉必將出師秋楚子師於武城以為秦援秦人侵晉晉饑弗能報也 冬十月諸侯伐鄭庚午季武子齊崔杼宋皇郟從荀罃士匄門於鄆門

衛北宮括曹人邾人從荀偃韓起門於師之梁滕人薛人從欒黶士魴門於北門杞人邠人從趙武魏絳斬行栗甲戍師於汜令於諸侯曰修器備盛饌糧歸老幼居疾於虎牢肆青圍鄭鄭人恐乃行成中行獻子曰遂圍之以待楚人之救也而與之戰不然無成知武子曰許之盟而還師以敝楚人吾三分四軍與諸侯之銳以逆來者於我未病楚不能矣猶愈於戰暴骨以逞不可以爭大勞未艾君子勞心小人勞力先王之制也諸侯皆

不欲戰乃許鄭成十一月己亥同盟於戲鄭服也將盟  
鄭六卿公子駢公子發公子嘉公孫輒公孫蔓公孫舍  
之及其大夫門子皆從鄭伯晉士莊子為載書曰自今  
日既盟之後鄭國而不唯晉命是聽而或有異志者有  
如此盟公子駢趨進曰天禍鄭國使介居二大國之間  
大國不加德音而亂以要之使其鬼神不獲歆其禋祀  
其民人不獲享其土利夫婦辛苦墊隘無所底告自今  
日既盟之後鄭國而不唯有禮與彊可以庇民者是從

而敢有異志者亦如之荀偃曰改載書公孫舍之曰昭大神要言焉若可改也大國亦可叛也知武子謂獻子曰我實不德而要人以盟豈禮也哉非禮何以主盟姑盟而退修德息師而來終必獲鄭何必今日我之不德民將棄我豈唯鄭若能休和遠人將至何恃於鄭乃盟而還晉人不得志於鄭以諸侯復伐之十二月癸亥門其三門閏月戊寅濟於陰阪侵鄭次於陰口而還子孔曰晉師可擊也師老而勞且有歸志必大克之子展曰

不可 楚子伐鄭子駟將及楚平子孔子矯曰與大國  
盟口血未乾而背之可乎子駟子展曰吾盟固云唯彊  
是從今楚師至晉不我救則楚強矣盟誓之言豈敢背  
之且要盟無質神弗臨也所臨唯信信者言之瑞也善  
之主也是故臨之明神不蠲要盟背之可也乃及楚平  
公子罷戎入盟同盟於中分楚莊夫人卒王未能定鄭  
而歸 晉侯歸謀所以息民魏絳請施舍輸積聚以貸  
自公以下苟有積者盡出之國無滯積亦無困人公無

禁利亦無貪民祈以幣更賓以特牲器用不作車服從  
給行之期年國乃有節三駕而楚不能與爭 十年夏  
四月戊午會于祖 晉荀偃士匄請伐偃陽而封宋向  
戌焉荀瑩曰城小而固勝之不武弗勝為笑固請丙寅  
圍之弗克孟氏之臣秦董父輦重如役偃陽人啓門諸  
侯之士門焉縣門發耶人紇抉之以出門者狄虎彌建  
大車之輪而蒙之以甲以為櫓左執之右拔戟以成一  
隊孟獻子曰詩所謂有力如虎者也主人縣布董父登

之及堞而絕之隊則又縣之蘇而復上者三主人辭焉  
乃退帶其斷以徇於軍三日諸侯之師久於偏陽荀偃  
士匄請於荀瑩曰水潦將降懼不能歸請班師知伯怒  
投之以机出於其閒曰女成二事而後告余余恐亂命  
以不女違女既勤君而興諸侯牽帥老夫以至於此既  
無武守而又欲易余罪曰是實班師不然克矣余羸老  
也可重任乎七日不克必爾乎取之五月庚寅荀偃士  
匄帥卒攻偏陽親受矢石甲午滅之書曰遂滅偏陽言

自會也以與向戌向戌辭曰君若猶辱鎮撫宋國而以偏陽光啓寡君羣臣安矣其何貺如之若專賜臣是臣興諸侯以自封也其何罪大焉敢以死歸乃予宋公宋公享晉侯於楚丘請以桑林荀瑩辭荀偃士匄曰諸侯宋魯於是觀禮魯有禘樂賓祭用之宋以桑林享君不亦可乎舞師題以旌夏晉侯懼而退入於房去旌卒享而還及著雍疾卜桑林見荀偃士匄欲奔請禱焉荀瑩不可曰我辭禮矣彼則以之猶有鬼神於彼加之晉侯

有間以偏陽子歸獻於武宮謂之夷俘偏陽妘姓也使  
周內史選其族嗣納諸霍人禮也師歸孟獻子以秦董  
父為右生秦丕茲事仲尼 六月楚子囊鄭子耳伐宋  
師於訾母庚午圍宋門於桐門 衛侯救宋師於襄牛  
鄭子展曰必伐衛不然是不與楚也得罪於晉又得罪  
於楚國將若之何子駟曰國病矣子展曰得罪於二大  
國必亡病不猶愈於亡乎諸大夫皆以為然故鄭皇耳  
帥師侵衛楚令也孫文子卜追之獻兆於定姜姜氏問

繇曰兆如山陵有夫出征而喪其雄姜氏曰征者喪雄  
禦寇之利也大夫圖之衛人追之孫蒯獲鄭皇耳於犬  
丘 秋七月楚子囊鄭子耳侵我西鄙還圍蕭八月丙  
寅克之九月子耳侵宋北鄙 諸侯伐鄭齊崔杼使太  
子光先至於師故長於滕巳酉師於牛首 諸侯之師  
城虎牢而戍之晉師城梧及制士魴魏絳戍之書曰戍  
鄭虎牢非鄭地也言將歸焉鄭及晉平 楚子囊救鄭  
十一月諸侯之師還鄭而南至於陽陵楚師不退知武

子欲退曰我今逃楚楚必驕驕則可與戰矣樂廩曰逃楚晉之恥也合諸侯以益恥不如死我將獨進師遂進已亥與楚師夾潁而軍子蟜曰諸侯既有成行必不戰矣從之將退不從亦退退楚必圍我猶將退也不如從楚亦以退之宵涉潁與楚人盟樂廩欲伐鄭師荀營不可曰我實不能禦楚又不能庇鄭鄭何罪不如致怨焉而還今伐其師楚必救之戰而不克為諸侯笑克不可命不如還也丁未諸侯之師還侵鄭北鄙而歸楚人亦

還 十一年春鄭人患晉楚之故諸大夫曰不從晉國  
幾亡楚弱於晉晉不吾疾也晉疾楚將辟之何為而使  
晉師致死於我楚弗敢敵而後可固與也子展曰與宋  
為惡諸侯必至吾從之盟楚師至吾又從之則晉怒甚  
矣晉能驟來楚將不能吾乃固與晉大夫說之使疆場  
之司惡於宋宋向戌侵鄭大獲子展曰師而伐宋可矣  
若我伐宋諸侯之伐我必疾吾乃聽命焉且告於楚楚  
師至吾又與之盟而重賂晉師乃免矣夏鄭子展侵宋

四月諸侯伐鄭己亥齊太子光宋向戌先至於鄭門於東門其莫晉荀瑩至於西郊東侵舊許衛孫林父侵其北鄙六月諸侯會於北林師於向右還次於瑣圍鄭觀兵於南門西濟於濟隧鄭人懼乃行成秋七月同盟於亳范宣子曰不慎必失諸侯諸侯道敝而無成能無貳乎乃盟載書曰凡我同盟毋蘊年毋壅利毋保姦毋留慝救災患恤禍亂同好惡獎王室或間茲命司慎司盟名山名川羣神羣祀先王先公七姓十二國之祖明

神殛之俾失其民隊命亡氏踣其國家 楚子囊乞旅  
於秦秦右大夫詹帥師從楚子將以伐鄭鄭伯逆之丙  
子伐宋 九月諸侯悉師以復伐鄭鄭人使良霄大宰  
石負如楚告將服於晉曰孤以社稷之故不能懷君君  
若能以玉帛綏晉不然則武震以攝威之孤之願也楚  
人執之書曰行人言使人也 諸侯之師觀兵於鄭東  
門鄭人使王子伯駢行成甲戌晉趙武入盟鄭伯冬十  
月丁亥鄭子展出盟晉侯十二月戊寅會於蕭魚庚辰

赦鄭囚皆禮而歸之納斥侯禁侵掠晉侯使叔肝告於諸侯公使臧孫紇對曰凡我同盟小國有罪大國致討苟有以藉手鮮不赦宥寡君聞命矣鄭人賂晉侯以師悝師觸師蠲廣車軌車淳十五乘甲兵備凡兵車百乘歌鍾二肆及其鑄磬女樂二八晉侯以樂之半賜魏絳曰子教寡人和諸戎狄以正諸侯八年之中九合諸侯如樂之和無所不諧請與子樂之辭曰夫和戎狄國之福也八年之中九合諸侯諸侯無慝君之靈也二三

子之勞也臣何力之有焉抑臣願君安其樂而思其終也詩曰樂旨君子殿天子之邦樂旨君子福祿攸同便蕃左右亦是帥從夫樂以安德義以處之禮以行之信以守之仁以厲之而後可以殿邦國同福祿來遠人所謂樂也書曰居安思危思則有備有備無患敢以此規公曰子之教敢不承命抑微子寡人無以待戎不能濟河夫賞國之典也藏在盟府不可廢也子其受之魏絳於是乎始有金石之樂禮也 十二年夏晉士魴來聘

且拜師 公如晉朝且拜士魴之辱禮也 冬楚子囊

秦庶長無地伐宋師於楊梁以報晉之取鄭也 十三

年春公至自晉孟獻子書勞於廟禮也 夏荀罃士魴

卒晉侯蒐於緜上以治兵使士匄將中軍辭曰伯游長

昔臣習於知伯是以佐之非能賢也請從伯游荀偃將

中軍士匄佐之使韓起將上軍辭以趙武又使欒黶辭

曰臣不如韓起韓起願上趙武君其聽之使趙武將上

軍韓起佐之欒黶將下軍魏絳佐之新軍無帥晉侯難

其人使其什吏率其卒乘官屬以從於下軍禮也晉國之民是以大和諸侯遂睦君子曰讓禮之主也范宣子讓其下皆讓樂厲為汰弗敢違也晉國以平數世賴之刑善也夫一人刑善百姓休和可不務乎書曰一人有慶兆民賴之其寧惟永其是之謂乎周之興也其詩曰儀刑文王萬邦作孚言刑善也及其衰也其詩曰大夫不均我從事獨賢言不讓也世之治也君子尚能而讓其下小人農力以事其上是以上下有禮而讒慝黜遠

由不爭也謂之懿德及其亂也君子稱其功以加小人  
小人伐其技以馮君子是以上下無禮亂虐並生由爭  
善也謂之昏德國家之敝恒必由之 鄭良霄大宰石  
彛猶在楚石彛言於子囊曰先王卜征五年而歲習其  
祥祥習則行不習則增修德而改卜今楚實不競行人  
何罪止鄭一卿以除其偏使睦而疾楚以固於晉焉用  
之使歸而廢其使怨其君以疾其大夫而相牽引也不  
猶愈乎楚人歸之 十四年春會於向執莒公子務婁

以其通楚使也將執戎子駒支范宣子親數諸朝曰來  
姜戎氏昔秦人迫逐乃祖吾離於瓜州乃祖吾離被苫  
蓋蒙荆棘以來歸我先君我先君惠公有不腆之田與  
女剖分而食之今諸侯之事我寡君不如昔者蓋言語  
漏泄則職女之由詰朝之事爾無與焉與將執女對曰  
昔秦負恃其衆貪於土地逐我諸戎惠公蠲其大德謂  
我諸戎是四嶽之裔胄也母是翦棄賜我南鄙之田狐  
狸所居豺狼所嗥我諸戎除翦其荆棘驅其狐狸豺狼

以為先君不侵不叛之臣至於今不貳昔文公與秦伐鄭秦人竊與鄭盟而舍戍焉於是乎有殽之師晉禦其上戎亢其下秦師不復我諸戎實然譬如捕鹿晉人角之諸戎掎之與晉踣之戎何以不免自是以來晉之百役與我諸戎相繼於時以從執政猶殽志也豈敢離邊今官之師旅無乃實有所闕以攜諸侯而罪我諸戎我諸戎飲食衣服不與華同贄幣不通言語不達何惡之能為不與於會亦無嘗焉賦青蠅而退宣子辭焉使即

事於會成愷悌也於是子叔齊子為季武子介以會自是晉人輕魯幣而益敬其使師歸自伐秦晉侯舍新軍禮也成國不過半天子之軍周為六軍諸侯之大者三軍可也於是知朔生盈而死盈生六年而武子卒彘裘亦幼皆未可立也新軍無帥故舍之

補國語悼公與司馬侯升臺而望曰樂夫對曰臨下

之樂則樂矣德義之樂則未也公曰何謂德義對曰諸侯之為日在君側以其善行以其惡戒可謂德義

矣公曰孰能對曰羊舌肸習於春秋乃召叔向使傳  
太子彪

發明按此則當時諸侯之史皆可謂之春秋不獨魯史  
也

冬會於戚范宣子假羽毛於齊而弗歸齊人始貳十  
五年夏齊侯圍成貳於晉故也於是乎城成郭冬晉  
悼公卒鄭公孫夏如晉奔喪子蟜送葬十六年春  
葬晉悼公平公即位羊舌肸為傅張君臣為中軍司馬

祁奚韓襄樂盈士鞅為公族大夫虞丘書為乘馬御改服修官烝於曲沃警守而下會於溴梁命歸侵田 晉侯與諸侯宴於溫使諸大夫舞曰歌詩必類齊高厚之詩不類荀偃怒且曰諸侯有異志矣使諸大夫盟高厚高厚逃歸於是叔孫豹晉荀偃宋向戌衛甯殖鄭公孫董小邾之大夫盟曰同討不庭 許男請遷於晉諸侯遂遷許許大夫不可晉人歸諸侯鄭子蟜聞將伐許遂相鄭伯以從諸侯之師穆叔從公齊子帥師會晉荀偃書

曰會鄭伯為夷故也夏六月次於械林庚寅伐許次於  
函氏晉荀偃欒廩帥師伐楚以報宋楊梁之役楚公子  
格帥師及晉師戰於湛阪楚師敗績晉師遂侵方城之  
外復伐許而還 秋齊侯圍成孟孺子速徼之齊侯曰  
是好勇去之以為之名速遂塞海陘而還 冬穆叔如  
晉聘且言齊故晉人曰以寡君之未禘祀與民之未息  
不然不敢忘穆叔曰以齊人之朝夕釋憾於敝邑之地  
是以大請敝邑之急朝不及夕引領西望曰庶幾乎比

執事之間恐無及也見中行獻子賦圻父獻子曰偃知  
罪矣敢不從執事以同恤社稷而使魯及此見范宣子  
賦鴻雁之卒章宣子曰句在此敢使魯無鳩乎 十七  
年春宋莊朝伐陳獲司徒印卑宋也 衛孫蒯田於曹  
隧飲馬於重丘毀其瓶重丘人閉門而詢之曰親逐而  
君爾父為厲是之不憂而何以田為夏衛石買孫蒯伐  
曹取重丘曹人愬於晉 齊人以其未得志於我故秋  
齊侯伐我北鄙圍桃高厚圍臧紇於防師自陽闕逆臧

孫至於旅松耶叔紇臧疇臧賈帥甲三百宵犯齊師送之而復齊師去之齊人獲臧堅齊侯使夙沙衛唁之且曰無死堅稽首曰拜命之辱抑君賜不終姑又使其刑臣禮於士以杙抉其傷而死 十八年夏晉人執衛行人石買於長子執孫蒯於純留為曹故也 秋齊侯伐我北鄙中行獻子將伐齊夢與厲公訟弗勝公以戈擊之首隊於前跪而戴之奉之以走見梗陽之巫臯他日見諸道與之言同巫曰今茲主必死若有事於東方則

可以逞獻子許諾晉侯伐齊將濟河獻子以朱絲係玉  
二穀而禱曰齊環怙恃其險負其衆庶棄好背盟陵虐  
神主曾臣彪將率諸侯以討焉其官臣偃實先後之苟  
捷有功無作神羞官臣偃無敢復濟唯爾有神裁之沈  
玉而濟冬十月會於魯濟尋溴梁之言同伐齊齊侯禦  
諸平陰塹防門而守之廣里夙沙衛曰不能戰莫如守  
險弗聽諸侯之士門焉齊人多死范宣子告析文子曰  
吾知子敢匿情乎魯人莒人皆請以車千乘自其鄉入

既許之矣若入君必失國子盍圖之子家以告公公恐  
晏嬰聞之曰君固無勇而又聞是弗能久矣齊侯登巫  
山以望晉師晉人使司馬斥山澤之險雖所不至必旆  
而疏陳之使乘車者左實右偽以旆先輿曳柴而從之  
齊侯見之畏其衆也乃脫歸丙寅晦齊師夜遁師曠告  
晉侯曰烏烏之聲樂齊師其遁邢伯告中行伯曰有班  
馬之聲齊師其遁叔向告晉侯曰城上有烏齊師其遁  
十一月丁卯朔入平陰遂從齊師夙沙衛連大車以塞

隧而殿殖綽郭最曰子殿國師齊之辱也子姑先乎乃代之殿衛殺馬於隘以塞道晉州綽及之射殖綽中肩兩矢夾脰曰止將為三軍獲不止將取其衷顧曰為私誓州綽曰有如日乃弛弓而自後縛之其右具丙亦舍兵而縛郭最皆衿甲面縛坐於中軍之鼓下晉人欲逐歸者魯衛請攻險己卯荀偃士臼以中軍克京茲乙酉魏絳欒盈以下軍克郭趙武韓起以上軍圍盧弗克十二月戊戌及秦周伐雍門之萩范鞅門於雍門其御追

喜以戈殺犬於門中孟莊子斬其櫛以為公琴己亥焚  
雍門及西郭南郭劉難士弱率諸侯之師焚申池之竹  
木壬寅焚東郭北郭范鞅門於揚門州綽門於東閭左  
驂迫還於門中以枚數闔齊侯駕將走郵棠太子與郭  
榮扣馬曰師速而疾畧也將退矣君何懼焉且社稷之  
主不可以輕輕則失衆君必待之將犯之太子抽劍斷  
鞅乃止甲辰東侵及濰南及沂 楚使子庚門於純門  
晉人聞有楚師師曠曰不害吾驟歌北風又歌南風南

風不競多死聲楚必無功董叔曰天道多在西北南師  
不時必無功叔向曰在其君之德也 十九年春諸侯  
還自沂上盟於督揚曰大母侵小晉侯先歸公享晉六  
卿於蒲圃賜之三命之服軍尉司馬司空輿尉候奄皆  
受一命之服賄荀偃束錦加璧乘馬先吳壽夢之鼎  
晉欒魴帥師從衛孫文子伐齊 季武子如晉拜師晉  
侯享之范宣子為政賦黍苗季武子興再拜稽首曰小  
國之仰大國也如百穀之仰膏雨焉若常膏之其天下

輯睦豈唯敝邑賦六月 季武子以所得於齊之兵作  
林鐘而銘魯功焉臧武仲謂季孫曰非禮也夫銘天子  
令德諸侯言時計功大夫稱伐今稱伐則下等也計功  
則借人也言時則妨民多矣何以為銘且夫大伐小取  
其所以作彝器銘其功烈以示子孫昭明德而懲無  
禮也今將借人之力以救其死若之何銘之小國幸於  
大國而昭所獲焉以怒之亡之道也 齊靈公卒晉士  
匄侵齊及穀聞喪而還禮也 冬十一月城西郭懼齊

也 齊及晉平盟於大隧故穆叔會范宣子於柯穆叔見叔向賦載馳之四章叔向曰盍敢不承命穆叔歸曰齊猶未也不可以不懼乃城武城 二十年夏盟於澶淵齊成故也 蔡公子變欲以蔡之晉蔡人殺之公子履其母弟也故出奔楚陳慶虎慶寅畏公子黃之偏愬諸楚曰與蔡司馬同謀楚人以為討公子黃出奔楚初蔡文侯欲事晉曰先君與於踐土之盟晉不可棄且兄弟也畏楚不能行而卒楚人使蔡無常公子變求從先

君以利蔡不能而死書曰蔡殺其大夫公子燮言不與民同欲也陳侯之弟黃出奔楚言非其罪也公子黃將出奔呼於國曰慶氏無道求專陳國暴蔑其君而去其親五年不滅是無天也 齊子初聘於齊禮也 二十一年春公如晉拜師 二十三年春杞孝公卒晉悼夫人喪之平公不徹樂非禮也禮為鄰國闕 陳侯如楚公子黃愬二慶於楚楚人召之使慶樂往殺之慶氏以陳叛夏屈建從陳侯圍陳陳人城板隊而殺人役人相

命各殺其長遂殺慶虎慶寅楚人納公子黃君子謂慶氏不義不可肆也故書曰惟命不予常 秋齊侯伐衛自衛將遂伐晉取朝歌以報平陰之役八月叔孫豹帥師救晉次於雍榆禮也 二十四年孟孝伯侵齊晉故也 齊侯既伐晉而懼將欲見楚子楚子使遂啟疆如齊聘且請期齊社蒐軍實使客觀之陳文子曰齊將有寇吾聞之兵不戢必取其族 秋齊侯聞將有晉師使陳無宇從遂啟疆如楚辭且乞師崔杼帥師送之遂伐

莒侵介根 會於夷儀將以伐齊水不克 冬楚子伐鄭以救齊門於東門次於棘澤諸侯還救鄭晉侯使張骼輔躒致楚師求御於鄭鄭人卜宛射犬吉子大叔戒之曰大國之人不可與也對曰無有衆寡其上一也大叔曰不然部婁無松栢二子在幄坐射犬於外既食而後食之使御廣車而行已皆乘乘車將及楚師而後從之乘皆踞轉而鼓琴近不告而馳之皆取冑於橐而冑入壘皆下搏人以投收禽挾囚弗待而出皆趨乘抽弓

而射既免復踞轉而鼓琴曰公孫同乘兄弟也胡再不  
謀對曰曩者志人而已今則怯也皆笑曰公孫之亟也  
楚子自棘澤還使蘧啟彊帥師送陳無宇 陳人復討  
慶氏之黨鍼宜咎出奔楚 二十五年春齊崔杼帥師  
伐我北鄙 夏五月乙亥齊崔杼弑其君光 晉侯濟  
自泮會於夷儀伐齊以報朝歌之役齊人以莊公說使  
隰鉏請成慶封如師男女以班賂晉侯以宗器樂器自  
六正五吏三十帥三軍之大夫百官之正長師旅及處

守者皆有賂晉侯許之使叔向告於諸侯公使子服惠伯對曰君舍有罪以靖小國君之惠也寡君聞命矣

秋七月己巳同盟於重丘齊成故也

臣士竒曰晉悼公惠伯談之子桓叔捷之孫而襄

公之曾孫也出居於周蚤有英譽厲公弑諸大夫

迎而立之其在周也單襄公稱其十一美行而屬

其子頃善視之迨反晉國年甫十四諸大夫逆於

清原悼公曰人之有君使出命也立而不從將焉

用君二三子用我今日否亦今日侃侃數言足以  
懾強臣悍將之氣固已竒矣及觀其初政逐不臣  
者七人選六官於民譽施舍已責宥罪薄賦以次  
舉行取靈成景厲隳壞之紀綱而振刷之英風偉  
畧震焯一時是以魯侯見而心折杞伯聞而驟朝  
其能招來宇下光復伯業有以也至其經畧中原  
首在誅宋之叛臣又能庸魏絳之策內和戎狄使  
邊鄙不擾民事以修故得一意南向與楚爭衡而

為諸侯倚庇其制楚也則不在虎牢梧制之城據  
鄭腹心而在知大夫分銳逆來還師以敝楚之計  
蓋楚鋒剽悍未可力爭晉即悉下河山之甲與決  
一戰幸而勝楚不能必其不謀再舉一往一來其  
勢兩敝惟以少制多使楚疲於奔命久將衰止而  
乃可為鄭息數十年之肩矣自此計行楚果坐屈  
三駕功成如操左契甚矣晉伯之成絳始之螢終  
之而金石之賜獨及絳而不及螢何也至鄭之所

以傾心惟在悼公推至誠以待之禮囚禁掠鄭人  
即吾人自非木石未有誠感之而不動者蕭魚以  
後三經楚師而鄭不叛雖曰南風不競天道多在  
西北要非鄭之一心於晉其與楚為會安能遲至  
二十四年之後乎獨恨以晉悼之賢東門納款不  
能力卻鄭賂以示義於天下而溺其歌鐘罇磬女  
樂二八春秋之世貪冒成風賢者不免而晉國尤  
甚可慨也又有異者文襄之伯皆以王室為先文

公出定襄王襄公朝王於温皆晉已事也况悼嘗  
託周單氏善之逆知其必反晉國而為之禮乃悼  
五合六聚未聞一事有關王室惟雞丘之軟王臣  
與焉又為瀆分而不可訓悼豈明於資而暗於學  
者耶至其工於取鄭而撫陳則拙巧於柔楚而服  
齊則疎英毅之氣銳始而怠終致有宣子假羽毛  
之事竟以失齊而悼且没矣邢丘委政而湜梁之  
會大夫遂主之姑息貽患亦悼盛德之累也迨夫

子黃納而楚橫朝歌取而齊大夷儀之役又以利  
隳為天下笑平公而下晉伯無足觀矣如悼公不  
誠賢君哉

左傳紀事本末卷二十九

欽定四庫全書

左傳紀事本末卷三十

詹事府詹事高士奇撰

晉楚弭兵

襄公二十五年趙文子為政令薄諸侯之幣而重其禮  
穆叔見之謂穆叔曰自今以往兵其少弭矣齊崔慶新  
得政將求善於諸侯武也知楚令尹若敬行其禮道之  
以文辭以靖諸侯兵可以弭 楚蘧子馮卒屈建為令

尹屈蕩為莫敖 二十六年許靈公如楚請伐鄭曰師

不興孤不歸矣八月卒於楚楚子曰不伐鄭何以求諸  
侯冬十月楚子伐鄭鄭人將禦之子產曰晉楚將平諸  
侯將和楚王是故昧於一來不如使逞而歸乃易成也  
夫小人之性釁於勇嗇於禍以足其性而求名焉者非  
國家之利也若何從之子展說不禦寇十二月乙酉入  
南里墮其城涉於樂氏門於師之梁縣門發獲九人焉  
涉於汜而歸而後葬許靈公 二十七年宋向戌善於

趙文子又善於令尹子木欲弭諸侯之兵以為名如晉  
告趙孟趙孟謀於諸大夫韓宣子曰兵民之殘也財用  
之蠹小國之大菑也將或弭之雖曰不可必將許之弗  
許楚將許之以召諸侯則我失為盟主矣晉人許之如  
楚楚亦許之如齊齊人難之陳文子曰晉楚許之我焉  
得已且人曰弭兵而我弗許則固攜吾民矣將焉用之  
齊人許之告於秦秦亦許之皆告於小國為會於宋五  
月甲辰晉趙武至於宋丙午鄭良霄至六月丁未朔宋

人享趙文子叔向為介司馬置折俎禮也仲尼使舉是禮也以為多文辭戊申叔孫豹齊慶封陳須無衛石惡至甲寅晉荀盈從趙武至丙辰邾悼公至壬戌楚公子黑肱先至成言於晉丁卯宋向戌如陳從子木成言於楚戊辰滕成公至子木謂向戌請晉楚之從交相見也庚午向戌復於趙孟趙孟曰晉楚齊秦匹也晉之不能於齊猶楚之不能於秦也楚君若能使秦君辱於敝邑寡君敢不固請於齊壬申左師復言於子木子木使駟

謁諸王王曰釋齊秦他國請相見也秋七月戊寅左師  
至是夜也趙孟及子皙盟以齊言庚辰子木至自陳陳  
孔奐蔡公孫歸生至曹許之大夫皆至以藩為軍晉楚  
各處其偏伯夙謂趙孟曰楚氛甚惡懼難趙孟曰吾左  
還入於宋若我何 辛巳將盟於宋西門之外楚人衷  
甲伯州犂曰合諸侯之師以為不信無乃不可乎夫諸  
侯望信於楚是以來服若不信是棄其所以服諸侯也  
固請釋甲子木曰晉楚無信久矣事利而已苟得志焉

馬用有信大宰退告人曰令尹將死矣不及三年求逞志而棄信志將逞乎志以發言言以出信信以立志參以定之信亡何以及三趙孟患楚衷甲以告叔向叔向曰何害也匹夫一為不信猶不可單斃其死若合諸侯之卿以為不信必不捷矣食言者不病非子之患也夫以信召人而以僭濟之必莫之與也安能害我且吾因宋以守病則夫能致死與宋致死雖倍楚可也子何懼焉又不及是曰弭兵以召諸侯而稱兵以害我吾庸多

矣非所患也季武子使謂叔孫以公命曰視邾滕既而齊人請邾宋人請滕皆不與盟叔孫曰邾滕人之私也我列國也何故視之宋衛吾匹也乃盟故不書其族言違命也晉楚爭先晉人曰晉固為諸侯盟主未有先晉者也楚人曰子言晉楚匹也若晉常先是楚弱也且晉楚狎主諸侯之盟也久矣豈專在晉叔向謂趙孟曰諸侯歸晉之德只非歸其尸盟也子務德無爭先且諸侯盟小國固必有尸盟者楚為晉細不亦可乎乃先楚人

書先晉晉有信也壬午宋公兼享晉楚之大夫趙孟為  
客子木與之言弗能對使叔向侍言焉子木亦不能對  
也乙酉宋公及諸侯之大夫盟於蒙門之外子木問於  
趙孟曰范武子之德何如對曰夫子之家事治言於晉  
國無隱情其祝史陳信於鬼神無愧辭子木歸以語王  
王曰尚矣哉能歆神人宜其光輔五君以為盟主也子  
木又語王曰宜晉之伯也有叔向以佐其卿楚無以當  
之不可與爭晉荀盈遂如楚涖盟宋左師請賞曰請免

死之邑公與之邑六十以示子罕子罕曰凡諸侯小國  
晉楚所以兵威之畏而後上下慈和慈和而後能安靖  
其國家以事大國所以存也無威則驕驕則亂生亂生  
必滅所以亡也天生五材民並用之廢一不可誰能去  
兵兵之設久矣所以威不軌而昭文德也聖人以興亂  
人以廢廢興存亡昏明之術皆兵之由也而子求去之  
不亦誣乎以誣道蔽諸侯罪莫大焉縱無大討而又求  
賞無厭之甚也削而投之左師辭邑向氏欲攻司城左

師曰我將亡夫子存我德莫大焉又可攻乎君子曰彼  
已之子邦之司直樂喜之謂乎何以恤我我其收之向  
戍之謂乎 楚遠罷如晉涖盟晉侯享之將出賦既醉  
叔向曰遠氏之有後於楚國也宜哉承君命不忘敏子  
蕩將知政矣敏以事君必能養民政其焉往 二十八  
年夏齊侯陳侯蔡侯北燕伯杞伯胡子沈子白狄朝於  
晉宋之盟故也齊侯將行慶封曰我不與盟何為於晉  
陳文子曰先事後賄禮也小事大未獲事焉從之如志

禮也雖不與盟敢叛晉乎重丘之盟未可忘也子其勸  
行 蔡侯歸自晉入於鄭鄭伯享之不敬子產曰蔡侯  
其不免乎日其過此也君使子展廷勞於東門之外而  
傲吾曰猶將更之今還受享而惰乃其心也君小國事  
大國而惰傲以為已心將得死乎若不免必由其子其  
為君也淫而不父僑聞之如是者恒有子禍 孟孝伯  
如晉告將為宋之盟故如楚也 蔡侯之如晉也鄭伯  
使游吉如楚及漢楚人還之曰宋之盟君實親辱今吾

子來寡君謂吾子姑還吾將使駟奔問諸晉而以告子  
大叔曰宋之盟君命將利小國而亦使安定其社稷鎮  
撫其民人以禮承天之休此君之憲令而小國之望也  
寡君是故使吉奉其皮幣以歲之不易聘於下執事今  
執事有命曰女何與政令之有必使而君棄而封守跋  
涉山川蒙犯霜露以逞君心小國將君是望敢不唯命  
是聽無乃非盟載之言以闕君德而執事有不利焉小  
國是懼不然其何勞之敢憚子大叔歸復命告子展曰

楚子將死矣不修其政德而貪昧於諸侯以逞其願欲  
久得乎周易有之在復  之頤  曰迷復凶其楚  
子之謂乎欲復其願而棄其本復歸無所是為迷復能  
無凶乎君其往也送葬而歸以快楚心楚不幾十年未  
能恤諸侯也吾乃休吾民矣裨竈曰今茲周王及楚子  
皆將死歲棄其次而旅於明年之次以害烏帑周楚惡  
之 鄭游吉如晉告將朝於楚以從宋之盟子產相鄭  
伯以如楚舍不為壇外僕言曰昔先大夫相先君適四

國未嘗不為壇自是至今亦皆循之今子草舍無乃不可乎子產曰大適小則為壇小適大苟舍而已焉用壇僑聞之大適小有五美宥其罪戾赦其過失救其菑患賞其德刑教其不及小國不困懷服如歸是故作壇以昭其功宣告後人無怠於德小適大有五惡說其罪戾請其不足行其政事共其職貢從其時命不然則重其幣帛以賀其福而弔其凶皆小國之禍也焉用作壇以昭其禍所以告子孫無昭禍焉可也 為宋之盟故公

及宋公陳侯鄭伯許男如楚公過鄭鄭伯不在及漢楚  
康王卒公欲反叔仲昭伯曰我楚國之為豈為一人行  
也子服惠伯曰君子有遠慮小人從邇饑寒之不恤誰  
遑其後不如姑歸也叔孫穆子曰叔仲子專之矣子服  
子始學者也榮成伯曰遠圖者忠也公遂行宋向戌曰  
我一人之為非為楚也飢寒之不恤誰能恤楚姑歸而  
息民待其立君而為之備宋公遂反 楚屈建卒趙文  
子喪之如同盟禮也 二十九年春王正月公在楚釋

不朝正於廟也楚人使公親禭公患之穆叔曰祓殯而禭則布幣也乃使巫以桃茢先祓殯楚人弗禁既而悔之夏四月葬楚康王公及陳侯鄭伯許男送葬至於西門之外諸侯之大夫皆至於墓三十一年十二月北宮文子相衛襄公以如楚宋之盟故也昭公元年楚公子圍聘於鄭遂會於虢尋宋之盟也祁午謂趙文子曰宋之盟楚人得志於晉今令尹之不信諸侯之所聞也子弗戒懼又如宋子木之信稱於諸侯猶詐晉而

駕焉況不信之尤者乎楚重得志於晉晉之恥也子相  
晉國以為盟主於今七年矣再合諸侯三合大夫服齊  
狄寧東夏平秦亂城淳于師徒不頓國家不罷民無謗  
讟諸侯無怨天無大災子之力也有令名矣而終之以  
恥午也是懼吾子其不可以不戒文子曰武受賜矣然  
宋之盟子木有禍人之心武有仁人之心是楚所以駕  
於晉也今武猶是心也楚又行僭非所害也武將信以  
為本循而行之譬如農夫是穰是莠雖有饑饉必有豐

年且吾聞之能信不為人下吾未能也詩曰不僭不賊  
鮮不為則信也能為人則者不為人下矣吾不能是難  
楚不為患楚令尹圍請用牲讀舊書加於牲上而已晉  
人許之季武子伐莒取鄆莒人告於會楚告於晉曰  
尋盟未退而魯伐莒瀆齊盟請戮其使樂桓子相趙文  
子欲求貨於叔孫而為之請使請帶焉弗與梁其鏗曰  
貨以藩身子何愛焉叔孫曰諸侯之會衛社稷也我以  
貨免魯必受師是禍之也何衛之為人之有牆以蔽惡

也牆之隙壞誰之咎也衛而惡之吾又甚焉雖怨季孫魯國何罪叔出季處有自來矣吾又誰怨然鮒也賄弗與不已召使者裂裳帛而與之曰帶其褊矣趙孟聞之曰臨患不忘國忠也思難不越官信也圖國忘死貞也謀主三者義也有是四者又可戮乎乃請諸楚曰魯雖有罪其執事不辟難畏威而敬命矣子若免之以勸左右可也若子之羣吏處不辟污出不逃難其何患之有患之所生活而不治難而不守所由來也能是二者又

何患焉不靖其能其誰從之魯叔孫豹可謂能矣請免之以靖能者子會而赦有罪又賞其賢諸侯其誰不欣焉望楚而歸之視遠如邇疆場之邑一彼一此何常之有王伯之令也引其封疆而樹之官舉之表旗而著之制令過則有刑猶不可壹於是乎虞有三苗夏有觀扈商有妣邳周有徐奄自無令王諸侯遂進狎主齊盟其又可壹乎恤大舍小足以為盟主又焉用之封疆之削何國蔑有主齊盟者誰能辨焉吳濮有釁楚之執事豈

其顧盟莒之疆事楚勿與知諸侯無煩不亦可乎莒魯  
爭鄆為日久矣苟無大害於其社稷可無亢也去煩宥  
善莫不競勸子其圖之固請諸楚楚人許之乃免叔孫

臣士竒曰自晉楚爭伯而宇下苦戰鬪不休至是  
師武謀臣力殫智索亦倦而思息會趙文子善於  
令尹子木而宋向戌又與二子交從而約劑其間  
此弭兵之好所自來也夫兵者民之殘而財用之  
蠹也使晉楚齊秦果能罷兵結好誰曰非數世之

利然而兵之不可去也久矣宋子罕責左師之言甚為明晰况弭兵則必使信而楚可信乎西門敵而子木衷甲以爭伯州犁止之而不聽也其言曰事利而已苟得志焉焉用有信則當始事而楚人之狡已見矣向令趙武亦猶子木則西門之外且為戰壘弭兵之約安在哉且其中尤有大不便者楚負淫名於天下非一日矣諸侯雖畏其勢而竊從之其心猶畏伯主之議其後也楚即奄然受諸

侯之成其心亦必有所顧畏而不安也自好合使  
成令諸侯之從交見於楚而內外無復辨冠履任  
其倒置矣所以紊大防而蔑大分者莫此為甚故  
當時欲弭兵則必令楚削去僭號修其職貢於周  
而後與之為好可也不如是則楚必不可邇楚必  
不可邇則兵必不可弭今乃舍其禦楚之具進荆  
蠻於壇坫使中原冠帶之邦相率而朝焉即魯公  
之親褻為辱亦大矣諸大夫暗於大較貪虛名而

忘實害子罕雖知兵之不可弭而不知其所以不  
可弭者在楚不在兵也於號之會仍讀舊書趙武  
終守弭兵之信蓋亦賢者然使楚得狎主諸侯視  
先大夫之戮力以攘楚者不有惡耶尋盟未退而  
魯即伐莒不信之尤先自中國開之於楚乎何誅

左傳紀事本末卷三十